



Terenga 4: Hōtaka 8 – Rerehāngū

He Mihi

Kia ora mai anō rā kei ngā ringa whatiwhati kō. E whai ana tātou i konei, kia tūperepere te māra o te reo. Nō reira haria mai tō kāheru kia kerī ngātahi ai tātou, kia ngaki ai tātou i ā tātou māra.

Hei Mahi Whakarongo

E whai ake nei ko te kaiwhakaari nō Ngāti Hine me ana whakamahuki mō ngā mahi kua kitea i tōna papakāinga. Hei ārahi i ngā taringa, anei ngā pātai hei whakautu mā koutou:

1. He aha ana kupu whakaahua i te hunga noho i te kāinga?
2. I karangahia te aha?
3. He aha tētehi kupu anō mō te 'rūpahu'?

Kia whakarongo ake tātou ki a Waihoroi.

He Whakamārama

Ko tā te rerehāngū, he arotahi ki tētehi mahi me te pānga o taua mahi ki tētehi mea, ki tētehi tangata rānei. Ko te tāhu o te rerehāngū, ko te mea e pāngia ana e te mahi. Tirohia te tauira nei:

E rawekehia ana e ngā tamariki o ēnei rā ngā tini hangarau o te ao hou.

He aha te mahi?

Raweke

Ko wai te kaimahi?

Ngā tamariki o ēnei rā

He aha te mea e pāngia ana e te mahi: *ngā tini hangarau o te ao hou*

Nō reira, he aha te tāhu? *ngā tini hangarau o te ao hou*

Kia mataara: Anei ētehi tūtukinga wae o te rerehāngū hei tuhi ki te rae:

1. Me + tuhia ✗ Me taea ✓
2. ...hei tuhia ✗
3. ...ki te tuhia ✗
4. Māku e tuhia ✗
5. Nāku i tuhia ✗
6. Tirohia i te tuhinga ✗

Hei Mahi

Whakatikahia hapa i roto i ngā rerenga kōrero e whai ake nei:

1. Nāku i tikina ngā kī o te waka.
2. Māku e haria tō pēke ki te kāinga.
3. Me kimihia e koe ō hū.
4. I haere au ki te kitea taku hoa i te hōhipera.
5. Koinā tētahi mea hei maumaharata mā tātou.

Whakautu:

1. Nāku i tiki ngā kī o te waka.
2. Māku e hari tō pēke ki te kāinga.
3. Me kimi e koe ō hū.
4. I haere au ki te kite i taku hoa i te hōhipera.
5. Koinēi tētahi mea hei maumahara mā tātou.